



Sultan Hassanal Bolkiah bersalaman dengan Anwar sebelum berangkat pulang di Pangkalan Udara Tentera Udara Diraja Malaysia di Subang, semalam. (Foto BERNAMA)

Malaysia - Brunei pererat kerjasama ekonomi, tenaga

Tumpuan kepada Sabah, Sarawak sebagai pemacu kemakmuran bersama serta integrasi serantau

Oleh Mohd Iskandar Ibrahim
bhnews@bh.com.my

Putrajaya: Malaysia dan Brunei sepakat memperkukuh kerjasama ekonomi dengan memberi tumpuan kepada Sabah dan Sarawak sebagai pemacu kemakmuran bersama serta integrasi serantau.

Dalam kenyataan bersama, Perdana Menteri, Datuk Seri Anwar Ibrahim dan Sultan Brunei, Sultan Hassanal Bolkiah, mengulangi komitmen memajukan inisiatif strategik dalam sektor tenaga, kesalinghubungan, pertanian, pelancongan dan industri halal dengan memanfaatkan sumber serta kedudukan geografi Borneo.

"Langkah itu diyakini mampu memperkukuh keselamatan makanan dan tenaga, membina rantaian bekalan berdaya tahan serta membuka peluang mampan kepada rakyat," menurut kenyataan itu.

Terdahulu, kedua-dua pemimpin itu menyaksikan pertukaran memorandum persefahaman

(MoU) berkaitan sektor kesihatan antara Menteri Kesihatan, Datuk Seri Dr Dzulkefly Ahmad dan Menteri Kesihatan Brunei, Datuk Seri Dr Mohammad Isham Jaafar di Kompleks Seri Perdana di sini.

Yang turut hadir, Premier Sarawak, Tan Sri Abang Johari Abang Openg dan Ketua Menteri Sabah, Datuk Seri Hajiji Noor.

Kedua-dua pemimpin turut mengakui kerjasama erat sedia ada dalam sektor tenaga antara Brunei dan Malaysia, termasuk potensi projek usaha sama baharu yang bakal memberi manfaat timbal balik.

Mereka juga berpuas hati dengan kerjasama rapat di antara PETRONAS dan Petroleum Authority of Brunei Darussalam melalui Commercial Arrangement Areas (CAA), sekali gus menggalakkan projek bersama diperkasa mengikut garis masa yang dipersetujui.

Selain itu, kedua-dua negara menyambut baik kemajuan projek sambungan tenaga rentas sempadan Lumut (Kuala Belait) - Tudan (Sarawak) yang dijangka membuka ruang perdagangan kuasa elektrik dua hala serta meningkatkan keselamatan tenaga serantau.

Senada isu Zionis

Sementara itu, Malaysia dan Brunei sebulat suara, mengemukakan keras kekejaman Israel yang terus menzalimi rakyat Palestin di Semenanjung Gaza, selain menyekat sepenuhnya akses bantu-

an kemanusiaan ke wilayah itu hingga menyebabkan krisis berlarutan.

Penegasan itu dizahirkan Anwar dan Sultan Hassanal Bolkiah pada Perundingan Tahunan Pemimpin (ALC) Ke-26 yang berlangsung di Kompleks Seri Perdana di sini, semalam.

Dalam kenyataan bersama, kedua-dua pemimpin menegaskan isu Palestin kekal menjadi teras konflik Asia Barat dan menyuarakan kebimbangan mendalam terhadap bencana kemanusiaan yang meruncing di Gaza.

"Tindakan itu mengakibatkan korban jiwa semakin besar, perpindahan paksa secara meluas, kebuluran sistematik dan kekurangan bekalan kritikal untuk menyelamatkan nyawa," menurut kenyataan itu.

Malaysia dan Brunei turut menolak sekeras-kerasnya rancangan menjajah sepenuhnya Semenanjung Gaza serta visi 'Greater Israel' yang disifatkan melanggar undang-undang antarabangsa, Piagam Pertubuhan Bangsa-Bangsa Bersatu (PBB) dan resolusi PBB berkaitan.

Selain itu, kedua-dua pemimpin membincangkan perkembangan terkini di Myanmar dan menyatakan kebimbangan mendalam mengenai keganasan yang masih berterusan di negara itu.

Kedua-dua pemimpin turut menyatakan penghargaan yang tinggi terhadap langkah positif yang diambil Kerajaan Kemboja dan Thailand untuk mencapai perjanjian gencatan senjata.